

四庫全書

集部

欽定四庫全書

集部

玉筭集卷二

詳校官監察御史臣劉湄

中書臣劉源溥覆勘

覆校官中書臣方大川

校對官中書臣潘奕雋

謄錄監生臣牟焜

氣類也是集卷首有同時楊維禎周砥戴良
及成化初安成劉鈺四序又孫大雅玉筍生
傳一篇楊基玉筍生一篇後一篇其平生事
狀尚畧具其梗概憲早歲入元都所作紅鬃
馬歌酬海一漚諸篇皆在集中奇氣鬱勃頗
有志于功名後從淮張之招非其本願故其
枕上感興詩云拓疆良在念擇木詎忘覩嘉
猷固久抱忠憤欲誰展蓋初同王粲之依劉

總校官臣陸費墀

玉筭集原序

予嘗於岳武穆王精忠錄閱先輩張思廉所作詩歌其辭氣抑揚感激所以為王自處而表其忠烈者曲盡無遺意其為人必慷慨瓌特以忠義自許非可以一詩人目之也惜未觀其全集以究其蘊迺者常山丞前侍御黃君玉輝發其尊府僉憲嘿庵先生所藏思廉玉筭集一帙將繡梓以傳託同年僉憲高公汝賢屬予序因得遍閱之其詠史非徒詳其事實且寓褒貶鑒戒之意其

琴操樂府五言及近體諸作通暢俊爽森嚴壯麗如入
羣玉之府琳琅琨瑤粲然照目如閱武庫之兵戈矛及
戟雜然陳列誠非苟作者於是益重其人焉蓋思廉當
元季擾攘之秋嘗仕為帥府參謀與僚寀議不合罷去
志不獲伸才不克售傷時感物而洩其悲憤於詩者如
是使其生當熙皞之世所以咏歌泰平之化當何如哉
嗟乎聖人刪詩三百篇其美其刺存乎勸戒下至楚騷
比物興言雖過乎怨其感人亦至矣漢魏而唐作者不

一獨杜子美之詩謂之詩史以其忠君愛國之誠懇也
思廉其殆欲追逐古作也與考其所交若鐵崖楊君伯
雨張君輩皆一時能言之士其所得固有自哉夫詩運
於精神心術之微勤一世以盡心而不得以詩鳴者多
矣間有鳴者不幸不見收錄於賢人君子往往湮沒無
聞者何可勝數獨思廉之詩晦於前而顯於今吾又幸
其有遭乎僉憲先生昔以邃學宿德提學於吾江右造
就士類甚衆玉輝能世其業立朝佐邑皆有聲茲又承

其先志不没人善以嘉惠後學可謂濟美者矣故為序
之不辭思廉名憲會稽山陰人其居有玉笥山自號玉
笥山人因以名其集云成化五年春三月既望賜進士
出身中憲大夫浙江等處提刑按察司副使奉勅提督
學校安成劉鈺序

欽定四庫全書

玉筍集卷一

元 張憲 撰

詠史

黃金臺

黃金臺高且堅三十六層凌紫烟上不貯妓女下不列
管絃鳳簫驚曲匪求偶銅盤露掌非希仙高城不築太
師塢黃屋肯飾吳王椽但欲強兵富國來英賢上雪父
母仇下洗黎庶冤黃金萬斤光燭天曰鄒曰劇相後先

樂生往兮重燕權燕鼎復兮齊鼎遷變雌冀兮為雄燕
嗚呼火牛觸燕師血刃樂生去兮燕土蹙黃金臺荒狐兔
伏昭王地下精靈哭

屠隱行

聶屠隱軹井里朱屠隱大梁市軹井七首尺有咫白日
殺人報知己梁市金椎四十斤捄趙功成耀青史兩屠
義勇勇不同金椎七首分雌雄丈夫一死泰山重七首
胡為成小用丈夫一死鴻毛輕聶屠之死不若朱屠生

荆卿嘆

白虹貫赤日易水生淒風燕人盡悲憤相送冀城中
築聲何慘慼歌意哀無窮豈不念即往立堪羸政胃徘徊
有所待匪畏秦帝雄自恨劍術疎未易了君事秣馬膏
吾車我友久不至奈何遽相促苦未知人意丈夫重然
諾斷臂死不辭但憐樊將軍九泉終見疑吐彼死灰兒
曷足同等夷

安期生

吾聞安期生賣藥阜亭東時人不識其始末見者但呼
千歲翁嗟嗟秦皇帝仗劍掃六合富貴亦已極猶欲事
吐納琅琊臺上三月留三晝三夜語不休黃金白璧賜
千萬阜亭棄置無人收空留赤玉烏報以後會期蓬萊
渺茫不知處童男艸女無歸時鮑魚風腥不忍嗅金棺
玉匣萬古埋僵屍悲無窮可奈何豈如安期者海上騎
青驪黃金化丹砂赤棗大如瓜遨遊宇宙間天地以為
家

勝廣

秦帝掃關東六王家業空
典墳俱燬滅兵器盡銷鎔
勝廣起田畝一呼天下同
雖然不成事亦足號英雄

秦鹿行

望夷宮中養秦鹿百二
山河春草綠穿花尚作呦呦鳴
寧識外人須爾肉李斯父子牽黃犬
上蔡東門志何淺
血污雲陽腰領紅狡兔縱肥能幾鬻
閹高貌軟足心路
稱馬獻君君不悟羣臣相視莫敢非
只恐出言丞相怒

丞相怒秦祚移函谷不守秦鹿馳高材疾足爭逐之項
王叱咤起烏騅日千里逐之不得不肯止人疲馬困烏
江死沛公隱芒碭手劍三尺長網羅一舉圍咸陽扼其
角剗其腸食肉寢皮傳後王秦鹿死走狗烹後人不用
悲韓彭帝王神器匪力爭炎炎火德多洪福前有高皇
後文叔回首平靈莽卓生漢業亦同蕉下鹿

滄海君

漸離筑中鉛作水荆卿臂落圖窮七鮑魚風起鸞車腥

不待明年祖龍死赤帝子滄海君劍三尺椎百斤千金
胡為輕報秦英雄不進圯橋履亦作秦皇刀下鬼

鴻門會

雲成龍氣成虎椎鼓撞鐘宴真主披帷壯士髮指冠側
盾當筵請公舞白髮老臣心獨苦玉玦三看君不語五
星東井夜聯珠天狗攬搶落如雨鴻溝咫尺接鴻門千
里神騅一夜奔君不見龍泉影裏重瞳瞽玉斗聲中五

體分

垓下歌

力拔山兮舉世稱雄
顧指諸侯兮孰與君王
一戰不遂兮胡為自傷
江東雖小兮勝負何常
努力君王兮亟渡江
賤妾請死兮先就劍芒

淮陰侯

勇畧震人主
奇功蓋天下
持此求令終
全身古來寡
淮陰將之傑
用智如炙輅
不忍衣食思
甘為轅下馬
重兵在掌握
茅土復求假
不悟齊巫言
終然三族赭
跳梁駒

更駕覆鍾金躍冶既匪跋扈雄大權宜早捨忠逆無定
見身敗慘裂瓦所以赤松遊浮榮真土苴

旦春詞

子為王母為囚赭我衣髡我頭終日春兮不死不得休
東望邯鄲兮漳水流使誰報汝兮終無由憶君王兮解
安劉不能遠慮兮為妾謀彼四老兮君何求

朱虛侯行酒歌

長樂宮中女天子盛設賓筵懽戚里百官侍坐莫敢違

諸呂誼聞笑聲起御史中丞不糾儀叔孫制作成虛禮
朱虛奉勅起行觴手提三尺昆吾鋼田歌聲振野鷄伏
頸血光寒漢道昌

悲吳王

悲吳王悲吳王後此五十年亂起東南方天下旣一家
骨肉母自傷胡為鑄金幣聚餼糧招亡命修甲兵几杖
不復朝西京博局之恨竟不置反相之語奚獨忘悲吳
王白髮種種心何長旣不能入武關扼咸陽又不能據

武庫食敖倉淹纏梁楚真自敗縱死東越非天亡君不
見下密老人首生角哀哉七王何不覺

廣川王愁莫愁曲

愁莫愁死即休鉛灌口刀灼眸托灰煮屍劍擊頭愁莫
愁永巷春深作繫囚愁莫愁老嫗哭使者來窮詔獄徙
上庸伏顯戮雪我無辜人十六

賣卜翁

三月長安道雨過街樹綠下有賣卜翁危坐營握粟舉

口講仁義旋式推禍福不學賈大夫憂來方賦鵬

巫蠱使

禪襪步搖冠曲裾紗縠衣偉哉燕趙士借問此為誰謁
帝登大堂利口興禍階能令親子恩愛一朝乖血濺
長安城屍橫泉鳩里雖族佞臣家不益儲君死望思思
不歸至今天下悲請聽三老議兒罪只當笞

董君行

長安三月春如畫賣珠兒騎公主馬青年廿九桃花顏

挾彈垂鞭花影下蟬翼

闕

噴紅絲鞞

黃金百斤壽佳客彩段千端貽後房長門

闕

行宮立

董君貴寵傾堂邑掖庭撥賜買筵錢御駕親臨百官集
煮豹屠麟考鼓鐘宰人蔽膝如花紅東廂未下膳夫拜

闕

傳謁主翁主翁極尊榮上殿不呼名北宮夜鬪

狗平樂畫調鷹入侍

闕

姑寢出從人主行生同歡樂死

同瑩君不見三斬罪名加弄子陞戟先生飢欲死

霍將軍

熒惑守

關

星鴟鴞叫庭樹車騎聲憑

關

來相捕赫

赫奕

關

豪君觸

關

王怒孱子不早誅悍妻尤可惡禍萌

在駢乘惡貫起投附茂陵休上書徙薪非不悟何事麒

麟樓猶圖博陸侯

月支王頭杯歌

朔風凍合諾真水東方寒日曛曛起白馬初腥徑路刀
一尺留犁攪金七穹廬側坐呼韓邪谷蠡撫掌賢王歌
割牲飲血定約束酒器高擎天

關

窩頂平額深如白玉

月角日庭糟透骨刃痕截斷伏犀根疑是晉陽劉智伯
金蓮鑿落玻璃盃銀稜闔葉車渠魁葡萄未闕小馬潼
桃花先染真珠醅老上單于遺手澤誰問戎王包馬革
藁街不鏤郅支頭將謂漢家輕首馘陳湯血戰未封侯
張猛韓昌何足責

上元夫人詞

七月七日夜王母降漢宮上元何夫人儀衛畧與同頭
作三角髻年可二十餘身著青霜袍坐擁紫霞車九雲

夜光冠六山火玉佩斂袂登殿階進向王母拜王母坐
止之呼與共良會翩翩三青鳥飛來綠窻歇口銜七蟠
桃甘脆勝冰雪劉郎非仙器內慾未斷絕懷核欲種之
開花待桃結一桃九千年徒爾縻歲月上仙啞然笑忽
逐綵雲滅

托孤行

河間有異女其氣上成雲望氣往求之乃得拳夫人夫
人雙握固見帝即披伸生子鉤弋宮立名堯母門一朝

忽被譴割愛非無恩子少母且壯亂階人所聞君王顧
大計牽去不容存拓跋踵遺範胡姬埋禍根司馬受寄
托弱兒終被吞乃知宣室畫僅有霍將軍

燕燕吟

燕燕在昭陽昭陽勝未央黃金塗地限白玉護椒房燕
燕情無已專寵恩無比啄死漢皇孫占斷張公子

名放
富平

侯哀哀許美人戚戚曹宮使綠綈方底赫蹏書

赫蹏薄
小紙也

天道好還須記取

折檻行

師傅不言事國柄歸五侯賢哉槐里令抗疏謁宸旒願
請上方劍先斷佞臣頭狂直不畏死甘心地下遊大呼
攀殿檻壯氣驚千秋御史將雲去將軍拜不休君王意
亦解折檻不容修表表直臣節漢廷無與儔

東門行

東都門外今古稀東宮二傅同日歸百官祖道設供帳
勅賜黃金作酒貲歸來日日會親友盡賣賜金買醇酒

白頭剛傅

蕭望之也

空勞勞一杯鴟羽不就獄博得君王祠

少牢

董舍人

董賢哀帝寵之

蓮箭銅壺催日晷舍人走報天顏喜日駮鸞駕共袂憑
夜直龍牀同臥起雙闕果愚立塚瑩洞口重殿營軒楹
珠襦玉匣賜秘器錦闌緋檻塗丹青金剪落衣龍袖斷
黃腸剗柏御棺成合門貴寵專天眷內筵屢上麒麟殿
元舅徒爭城邑封天子已師堯舜禪古來喪邦由女色

藉閱韓鄧多男德司馬何為位獨尊曼柔便辟能傾國

王莽

白髮大師躬拜塵

孔光

病兌中郎堅避姻

中郎望之子蕭咸也賢父

恭嘗為子求咸女咸避

羸屍未入園扉裏漢業潛移王巨君

巨君王賀

女為元帝后

聖女謠

陰為陽雄天道

闕

元城郭東君莫語繡衣御史活千人

王賀

火土相乘生聖女六百四十又五年漢家大業歸齊

田夢中誰報滿輪月尤物禍人天使然

闕

諸子多女

德丙殿目成意相得畫堂良夜太孫生兄弟五人俱食
邑日月無光黃霧昏諫書終莫奪天恩兵權國柄遞相
襲四世母儀培禍根黃耆龍鍾容色槁銅壁鬼符夸壽
考黑貂徒守舊家風
太后令官屬
黑貂用漢臘白玉已虧傳國寶君
不見持詔籌行藁
榘析關踰牆走不休君如不信西王
母試看門樞亦白頭

昆陽行

天囚行屍聚蜂螳新市平林健兒起白水真人應讖文

春陵子弟持弓矢切雲高冠闕錦袍朱旗白馬青龍刀

漢官威儀喜復見下視赤眉銅馬闕

長驅宛鄧摧

枯葉夜火軍書連奏捷八千驍果獨鏖鋒誰道將軍平

日怯司徒司空雙將兵百里晴雷鼙鼓聲長人壘尉不

護壘四十萬人同日崩昆陽城濠水流血六十三家謀

議拙象犀瞑目虎豹蹲疾雨狂風天降孽司徒授首司

空奔長安四面兵雲屯承明殿裏目避火敬法闥前誰

斧門君不見啗鮫魚讀兵書漸臺勢促將何如天符金

櫃不復驗侈口屨頤終就誅衽袖之衣虞舜七按圖旋
席猶逃死七珠斗柄不掩身劉秀明年作天子

井底蛙 公孫述

清水令井底蛙鸞旗旄騎稱警蹕垂旒佩玉登龍車不
知天下本一家雌雄未決胡矜夸井底蛙井中小堂堂
東帝天日表南廡岸幘彼何心都市單衣笑君鉸君不
見故人共臥嚴子陵一夜客星侵帝星何嘗解作木偶

形

強項令

董宣

夏門亭東數公主格殺蒼頭如殺螳一言回天天亦喜
縱奴殺人何以理擊頭流血臣所甘俯首頓地臣所恥
賜錢三十萬分須不私已強項縣令今豈無不遇明君
空筆死

跋扈

梁冀

乘氏忠侯骸未冷癡兒遽起專宮省使者彈章十五條
極惡猶遺進湯餅夏門亭外迎鸞車嘗侍私謀定蠹吾

寃刑誰復捄李杜公議徒然唾趙胡將軍權勢迷天日
天富淫人天益疾白鵠書生獻佞詞絳帳名儒繞掌筆
長史忠言若不聞故吏諫書何足云佩刀夜落議郎省
日食明誅言事臣埤憤獄冠異巾服彈碁挽滿俱精熟
兔園羽蓋鼓吹喧喚起花奴陪蹋踑連房奧室相對街
飄飄雲氣如蓬萊黃金白玉充藏室門外車聲聒旱雷
土山千里九折坂臂鷹走馬歸來晚誰盜千金十斛珠
坐使良民喪貲產守藏婢監宅奴奴何幸婢何幸羽林

奪劍不論罪歲餘又贖張尚書口吟舌言剩積惡豺目
爲肩不暹誅君不見墮馬髻折腰步愁眉一旦濕啼粧
蓋世榮華遂飛絮七君三后六貴人將校尹卿同日仆
家財三十萬萬充王府為謝皇家戚里賢勿效將軍懷
跋扈

黨錮獄

漢桓帝延禧九年
殺成瑨等并黨人

黃門貂璫乃專殺生內幹心膂外典政刑樹立饕餮傾
陷忠貞牢修一紙四海俱驚使者四出捕逮縱橫囊頭

五木拷掠咨榜詔獄慘酷有寃誰聲賢哉賈長奮袂西
行網羅解張大禍底寧云胡諸公既哲且明不晦其光
尚貪美名卒蹈大戾自殞厥生乃有君子龍蛇潛伏匪
惠匪夷靡榮靡辱不近軒冕不罹桎梏茂樹鬱盤爰托
我屋

誅宦官

漢靈帝建寧元年太傅陳蕃等
奏誅宦者曹節等不果俱被害

太白入房天示傲上相上公俱有昔侍中已奏天官書
北寺獄詞猶上請五官令史發奏章姦謀夜召共與張

尚書詔版出脅筆一十七闔心計長白頭老翁短才術
拔劍突門肆呼叱門生官屬務相隨誰解盡言箴八失
嗚呼太傅死將軍誅洛陽都亭集血顱宗親賓黨一日
屠朝廷大柄歸闖奴胡為何國舅

中平元年何進誅宦官張進等又不果被

害不肯鑿前車又向嘉德殿前伏屬鏤誅宦官良可乎

千里草謠

董卓

青青千里草荒遍長安道軋軋闕靡車金花蓋飛皂天
子任廢置公卿聽呼召生殺擅大權劫殺甚群盜築塢

高埒城埋金動盈窖司徒展祕謀義子奉密詔逆屍不
待燃臍炷自堪照乃知董公力驅除付姦操

一 栖謡

獻帝興平二年郭汜
李傕劫帝入其營

一 栖不兩雄治兵日相攻北營

李傕劫萬乘南砦郭質三

公祠鬼淫祠下朝王葦箔中上供牛骨臭賜質馬錢空
夜火焚行殿妖氛貫紫宮鳴錐驚輦轂飛矢射簾櫳天
子猶徒步何人敢騎從顛危策東澗狼狽走新豐皇極
災頻煽朝廷塵再蒙誰能為此禍宣義是元功

大礪謠

公孫瓚以此謠徒鎮易積谷休兵以待天下之事後袁紹攻敗自焚死

燕南陸趙北際中不合大如礪惟此中可避世移易鎮
築易京廣積穀多屯兵閱世變待時平大柱折隊道裂
樓櫓傾骸骨藝白馬義從不自亡誰為劉虞洗冤血

梁父吟

武侯成就關張勝晏子殺三士多矣故反其詞

伏龍隱南陽高臥久未起不肯渡長江焉能涉漳水炎
炎火絕卵金刀巍巍土王當塗高種瓜兒子不力戰織
履郎君無地逃伏龍一起捍坤軸雄據西南成鼎足十

年汗血戰玄黃五出王師爭九六萬人之敵兩熊虎百
戰辛勤事行五河南河北謾稱雄不得表曹一丸土伏
龍繞起帝業新千古君臣魚水親遂使真龍全羽翼風
雲成就二將軍

南飛鳥

曹操

南飛鳥尾畢逋白頭啞啞將衆離渭河西岸逐野馬

破黃

中白門東樓追赤兔

擒呂布也翼豚

表荆犬

劉琮

肉不飽展翼

南飛向江表江東林木多俊禽不許南枝三匝遶老鳥

莫侮髯郎小髯郎詎讓老烏老東風一炬烏尾焦不使
老烏矜觜爪老烏自謂足姦狡豈信江湖多鷲鳥捽鳥
頭啄烏腦不容老烏棲樹枝肯使蛟龍戲池沼赤壁釋
老烏未肯搏紫髯大耳先相攫河東老羽雲外落雲長
老烏巢成哺銅雀死

合肥戰

當陽坂能以窮兵拒曹操逍遙津不能以合師抗張遼寧統諸將不及飛遠矣

賦合戰肥

合肥戰戰甚力盪寇將軍持銳戟甘寧紫髯郎君馬飛空

孫權

江表虎臣俱辟易君不見瞋目橫矛決死戰

張飛

百萬

曹兵莫敢逼止啼之威未為特惜矣江東無令德

縛虎行

白門樓下兵合圍白門樓上虎伏威戟尖不掉丈二尾
袍花已脫斑斕衣碎虎腦截虎爪眼中視虎如貓小猛
跳不越當塗高血吻空腥千里草養虎肉不飽虎饑能
噬人縛虎繩不急繩寬虎無親座中叵信劉將軍先不
縱猛虎食漢賊反殺猛虎生賊臣食原食卓何足嗔

獵許行關羽

老髯古義勇望蓋取顏良况茲遊獵時獵操如獵獐桓
桓劉將軍度量符高皇帝王討賊有大義豈與蛛蝨爭
小智丈夫成敗皆聽天利鈍兵家乃常事髯郎勿用苦
相尤飄飄江渚吾何憂

成子閣識

諸葛恪

越椒滅若敖伯石喪羊舌生子縱多才禍福未可決藍
田產玉信佳兒剛戾自用誰能醫西朝大志不易繼

西朝

蜀也恪乃諸葛亮姪
欲繼其出師表之志

東關小勝何足奇大臣未附主少

國疑呂侯有深戒一事須十思

呂岱戒諸葛恪曰世方
多難子每事必十思

豈宜履敵庭千里勞戎師新城一剄不自谷

張特守新
城恪攻將

陷持給之曰明早送降恪從之
緩其攻持夜補其闕遂攻不下歸來憤色將誰移虹繞

輿犬銜衣水腥血臭知不知獨不聞童謠云廬葦單衣

箴落於何相求成子閣

費尚書

蜀費禕被魏中
郎郭循刺之

尚書秉國樞詎宜矜有餘縱不愛身須愛國富兒尚保

千金軀來敏基

魏曹爽冠漢中勅禱救之來敏詣禱別求圍基禱無倦色敏因曰公必能辦賊

張疑書

疑嘗致書於禱引岑彭來歙為戒欲禱防循禱不從故被害

嗟哉二子多良

圖尚書何不置之左右隅西平之子何足誅

夕陽亭

晉裴楷惡賈充薦充督秦涼諸軍充問計于荀勗曰辭之實難獨結婚太子可不辭而自留矣充妻遂賂楊后左右納其女成風果留不遣

百官供帳紛營營夕陽亭西誰遠行充問之子專閫鉞

仗節萬里西南征結婚一語聾天耳既鑿凶門行復止

衛家五美空善評姦謀仍落三豎子君不見鬼公怒攝

項城軍殘喘聊延衛府勲枯木劍鋒金屑酒天刑猶脫
廣成君

玩鞭亭

晉王敦在姑孰明帝出看敦營敦夢覺
逐帝帝以馬鞭與老媪及追者至問媪
去追不及

畸烏壓營營作聲紅光紫電圍金釭黃鬚小龍馬上笑
白首饑豺夢裏驚老奴怒擲珊瑚枕追兵起合琉璃井
巴馬東歸疾似風道傍遺糞如冰冷健兒空玩七寶鞭
荆臺老媪功誰傳

孟參軍 孟嘉

卷一

孟嘉盛德士而有敏瞻才觀其言動間正順不可階雖云善酣飲亦不傷雅懷以此得聲譽何必狂與乖

五湖長

桓元後僭號楚被都護馮遷斬於枚回洲傳首梟于大桁

父為九州伯兒作五湖長父子共一轍相繼猶影響老奴首領幸爾全豎子凶逆那可言流芳本不願百世遺臭竟能傳萬年五湖長晉之賊總百揆稱相國封十郡加九錫坐南面以負宸竊神器而改歷司徒奉璽綬萬

乘讓宸極永始建新元
偽楚承金德百官勸進稱聖明
龍牀后土為之傾
草間英雄興甲兵
龍行虎步見者驚
大言欲俟關河平行宮起居注
未成義兵已破潯陽城
漢中遁舟胡可到回州短刃遙相迎
楚王楚帝幾日榮
血顱糝糊梟大桁

舉几行

南宋劉太子劾殺其父義備兵入
合殿義隆舉几捍之五指皆落

舍章殿前玉像毀畫輪車發宮門
啓逆刃鏗鏘五指紅
衛兵夢醒烏皮几五州屯將不舉兵
無復人間有人理

裁弟事易裁兒難謀及婦人何足歎江竿漏言宮甲起
楚太子商臣弑其父靈王君王不記請熊蹯

寇天師

天師元是嵩山生挺身起繼張道陵嵩高山頭遇老子
親手自傳圖籙經北方真君開太平天師亦出臣朝廷
平生不好莊老書當時只賢崔司徒奈何獨執弟子禮
膜拜甘作天師奴上玄靈命不可孤牲牢玉帛走道途
重壇五層凌紫虛日中會設千人厨顯揚新法終何如

君不見司徒不救謗國誅真人亦罹凶刃屠平城道場
成茂區天宮靜輪何可証

高令公

元魏高允為人內文明外柔順崔浩嘗
譏其乏矯矯風節及浩得罪聲嘶股栗
不能言允申釋是非辭氣清辨其矯矯
者勝浩多矣嘻人固難以外貌識也必
歷患難而後見予疾夫今之外以玉馬
自銜而中實不然者賦令公辭以傷之
馬

珽珽矯矯玉以璞兮駑馬矯矯驥踧踏兮其終也璞者
以琢矯矯碌碌兮又其甚也踧者以服矯矯齮齬兮嗟

人固不易知兮非朝夕可能窺也事固不可辨兮必悠
久而後見也嗟乎渤海茫茫兮高公已而去者莫追兮
來者其誰

魏孝靜別六宮歌

齊高洋逼帝禪位帝曰推挹
已久謹當避遜求入與六宮

別舉宮
皆哭

獻生不辰兮身播國移永作虞賓兮命不復來弊履遺
簪兮古人所思况茲六宮兮豈一嬪與妃玉體其可愛
兮黃髮又奚可期出雲龍門以悵望兮固十步而九回

彼永言以見貽兮淚浪浪其為誰

梁簡文飲酒歌

侯景弑簡文以絕眾望使王偉等進酒簡文知其將殺已盡醉

而寢偉進土囊壓殺之

龍為魚兮宗社移位既禪兮公復何疑此酒可盡兮飲
不辭却手琶兮推手琵琶四絃嘈雜兮聲急調悲不圖為
樂兮至於斯

龍光殿

梁湘東王繹繼立號世祖孝元帝一日嘗講老子于龍光殿魏于謹入江陵執

之囚於烏縵之下

赤氣干北斗太陰犯天王天道信可懲人事關興亡奈
何龍光殿戎服講老子玄談縱精緻不救烏縵恥介馬
不習騎死矣獨目兒

胭脂井

陳後主

胭脂井瑪瑙琉璃欄黃金轆轤銀綆寒桃花小波下
無底雌龍古怨沉紅水妖姬不作井中鬼玉樹飛花落
如雨

鴛酒來

隋煬帝

鳩酒來鳩酒不來白練來夜觀天象文帝座疑有災雍
州破木不可作龍船萬里浮龍骸丹陽築宮事已晚流
珠堂下凶門開佳城不受漆牀版臭土竟污吳公臺騎
牛小兒空有意李密龍鍾老父徒興哀鳩酒來白練冷蕭
娘不墮燕支井玉掌空摩長脰脰三尺天戈全項領

玉筍集卷一

欽定四庫全書

玉筭集卷二

元 張憲 撰

詠史

太子建成胡馬駒行

昭陵六馬平羣雄胡駒西來歸春宮春宮飽養叱肥脂
豈識天策上將人中龍胡駒爭獍善踞嚙不逐秦鹿空
三蹶不學拳毛騮美良川下追金剛不學什伐赤虎牢
關前擒夏王隨風逐電日千里百戰馳驟無與當青驩

拔箭吻帶血黃驃突圍毛裏鎗玉驄露紫競神俊畫圖
想像猶龍驤西府真龍正宸極東宮華殿生荆棘昭陵
風雨夜聞嘶六馬功成化為石胡駒老去空伏櫪

代魏徵田舍翁詞

井序

鐵厓楊先生以殺田舍翁為文皇根心語蓋
徵好直諫忤意者數矣是必有弗堪其直者
故怒曰會須殺此田舍翁不覺其言之出口
也此則是也然謂徵東宮臣節之虧故為太

宗所薄而呼為田舍翁者此則非也始徵入
關無所知名乃自請安集山東招徠李勣高
祖授以洗馬與王珪同僚東宮者官也非臣
事建成也徵勸建成早除秦王者是徵盡其
職非所以取憾於文皇也文皇亦不以是憾
徵也建成死高祖命東宮齊府官屬盡聽秦
王處分則徵安得獨背勅旨而死建成之難
乎徵天子之臣非東宮私臣其事太宗不得

謂之虧臣節也故太宗謂長孫無忌曰徵珪
盡心所事故我用之長孫后亦曰妾亟聞陛
下稱重魏徵不知其故觀此則知太宗決不
薄徵決不薄徵而有田舍翁之語何也蓋徵
貌不逾中人而舉止踈慢則徵得名田舍其
以此與雖然此語徵不知也徵知必有詞使
太宗果殺田舍翁翁必乞一言而死決不緘
口就戮也其以長孫后諫而意悅亦以后言

婉而有理故曲從之然其殺徵之意未嘗不
根於心也他日疑其黨侯杜怒其錄諫草而
徵已死無所洩憤故停叔玉婚仆所撰碑也
嗚呼徵幸而不在若在則恐不免為忠臣矣
夫盧祖尚死於朝堂張蘊古死於刑獄李君
羨死於圖讖劉洎張亮死於誣謗孰謂太宗
不忍於殺徵也徵能入夢於太宗而不能自
明其事故代田舍翁詞補徵諫錄云

臣本山東農臣誠田舍翁臣以隋末亂出仕蒲山公蒲山復諫自用故臣言不用臣計不從百萬糧一日盡百萬衆一夕空力屈事去歸山東臣義不忍棄故土事仇充相隨西來朝真龍先帝不臣識大臣不臣通故臣上書自請安山東山東歸皇圖授臣洗馬之職在東宮東宮多不德兄弟不相容臣教太子剪黑鬪親元戎又教太子除陛下太子不臣庸太子既死先帝命臣聽陛下處分臣安敢效匹夫小諒自與逆黨同陛下以臣盡心

所事赦臣死罪除臣祕書登臣政府爵位崇臣於是感
激時時進諫開皇哀陛下幸而時聽臣言以致四海太
平年穀豐使陛下功德及堯舜則臣心喜小有過失則
臣心忡是以不四年中而有三代風陛下初年誠心聽
諫故天耳聰今聽諫不逮昔故天耳聾往以未治為憂
故人心悅今以既治為安故威德隆往日用臣言賜臣
以黃金甕天廐驄輟殿材構臣屋與墉今日以人言仆
臣墓碑停臣子婚為惠胡不終喜臣則謂臣媿媚惡臣

則詈臣田舍翁陛下不宜以喜怒毀譽損厥躬臣薦侯
與杜謂其才畧雄臣豈阿黨預知其終凶臣錄諫疏草
前後三百封欲使後世知陛下能聽諫致時雍豈欲賣
直歸過為己功避嫌焚草徒足恭臣幸而身先朝露使
臣不幸恐不免隨比干侶龍逢獨不記臣言良與忠胡
為乎會須殺此田舍翁田舍翁豈畏死但惜陛下旣殺
張亮又誅劉洎剪刈大臣如刈蓬臣不願陛下祠少牢
立仆石但願陛下養氣質除內訌毋以喜怒存諸曾大

臣無災帝德穹社稷無虞王業鴻千秋萬歲為唐宗老
臣不諱田舍翁嗚呼老臣不諱田舍翁

過馬詞

武氏之讖太宗欲盡殺宮中疑似者而
才人在側不疑也豈非蔽于色與武氏
又能以柔言令色事帝帝固不疑之過
馬之言天誘其衷使之自露芒角千載
之下使人聽其言猶凜凜有英雄氣其
志必不減高歡也而帝不悟方且壯之
嗚呼何物女子如此勇健之語徒能發之
於李君羨甚矣聲色之蔽人也文皇且
不免况雄奴
之懦者乎

河東女兒年二九欲取鐵過過馬首雄心詎減賀六渾

金史卷之二
卷二
何事君王不驚聽獨不記女武主在宮中玄機預泄李
淳風淫心濫殺五娘子聲色蔽人無不聾

聖母神皇詞

東風未燥昭陵土感業尼稱天下母則天唐室山河忽變

周李氏兒郎更姓武洛水泱泱出寶圖黃金爛爛鑄天
樞五王不入迎仙院二豎能忘受命符君不見漢家元
后號文母廟食從來姪祀姑

匡復府

揚州都督開三府十萬強兵猛如虎駱生長檄魏生謀
大義精忠照千古山東豪傑望旌旗蓄縮江淮立伯基
莫指金陵圖王氣石梁鴉噪髑髏悲

桑條韋

英英武媚娘競行新樂章洪音入周廟誰復歌堂堂若
若桑條韋雅製勞奉常女妖重疊起兒婦繼姑嫜公主
賣美官墨勅斜封長昭容持大秤榮辱隨低昂點壽煩
玉指握槊穢椒房功臣不脫死元子亦罹殃潞州別駕

不發憤神器遽能歸相王

机上肉

机上肉禍之胎幽求先見孰與並季昶獨斷真奇才去
草不去根噬臍已無及十死鐵券不逃刑五部空王難
久立君不見曳竹槎飲葛汁漢陽白髮老不歸瓊州碎
骨人誰拾机上肉能幾宿尚記漢家夷產祿羽林大將
蓄奇謀三尺短刀門外伏机上肉終自毒

玉真仙人詞

玉真何仙人唐帝之愛女願辭湯沐邑削號去公主頭
戴九雲髻身著六銖衣甘居石寶洞不戀繡羅幃夜枕
白雲宿朝乘紫電飛登天謁王母渡海尋江姘天鼓夜
作響玉池畫生肥眼角有時方童顏當世稀乃知皇姑
娣不是壽王妃

天寶詞

林甫官朝日韓休罷相時新臺初納婦興慶又生兒玉
柵籠鸚鵡金盤進荔枝內前車馬亂無地避諸姨

雙廟詞

睢陽戰敗血飄杵力屈猶思為厲鬼
玄元祠前哭一聲
朝食愛姬暮羅鼠唐家宮殿秋草生
二十一陵如掌平
獨遺雙廟門前石日有行人來繫牲

神雞童

神雞童解雞語青年十三動人主
雞坊小兒五百人指
揮進退皆由女雲華鵬翠聳寶冠
白綉羅襦耀金縷振
木鐸麾玉塵率雙雄分兩旅
導立羣雞皆有序左雄巍

冠滴紅藍右雌彩翮翻花羽短味磨鐵吻鋼鉤礪銅距
怒頸刺蝟張老拳雙鶻舉強者昂藏弱者僂龍顏一笑
爲君傾賜賚金繒多如雨劍尖跳算頭舞弄丸兒走繩
女教坊百伎皆色沮君不見千里東封隨軟輿父死歸
葬天恩殊縣官具葬器役夫挽喪車乘傳洛陽道走馬
長安衢奪情起復不暫置明年會駕驪山隅寵榮富貴
世莫比何必宋宗勤讀書

大腹兒

鹿巫夜禱輒犖山淫光下燭穹廬寒柳城胡兒不敢睡
四野惡聲啼狗肝猪龍怒磔老梟腹鱗甲粗踈頭角禿
婪酣大肚三百斤偷得真龍半分福平盧寶刀未發研
范陽氈帳先潛形金雞口吐東北赦青驃蹄作西南聲
鳳凰池荒金鏡破獬豸臺傾胡眼大東風野鹿嚼楊花
白日妖狐登御座華清玉甃湯作泉洗兒果撒黃金錢
并刀剪綵十六幅錦棚壓碎宮娥肩象牀夜冷嬰兒哭
猪龍爪破金訶玉香齧不痛荔枝漿雄心已飽雞頭肉

長安天奪蜜口臣銅頭鬼鼓漁陽塵赤心一夜變胡腹
二十四郡都無人潼關夜漏雞聲早馬嵬坡下冰山倒
劍門西寄杜鵑巢練帶玉環埋翠草嘉山土門勤戰功
猪兒帳下屠猪龍旄頭星落大腹破机上鸞刀一尺紅

偃月堂

丞相總朝綱謀深偃月堂腹中有長劍不用夜遷牀

射塔謠

南八男兒忠義腸一死不負張睢陽救兵不出嚼指傷

天箭射塔塔欲僵男兒姓名千古香柳碑自與長淮長

陳濤斜

陳濤斜四萬義兵焚牛車東青坂再戰南軍俱不返兩
書生一琴客敗軍蠹政誰之責君不見閬州丹旆歸來
晚魚飡預定龜茲板

白衣山人 李泌

白衣者山人黃衣者聖人聖人起作中興主山人出為
謀畧臣王師尚未誅安史何事山人先納履學仙本不

為長生且向北雞逃一死黃瓜臺下黃瓜稀黃衣復國
青驪歸飛龍殿使交鎖鑰天下之事無可為白衣不復
入京國歸食衡陽三品食芋頭飽啖懶攢殘留取遺謀
匡代德

李五父 李輔國

靈武儲君奮潛邸飛龍小兒乘勢起大權世襲脫靴翁
從此門生視天子閹佞職本黃門郎抵用收權生禍殃
中宮狡計殺張后西內禁兵遷上皇李五父唐之悖天

刑不正市曹誅半夜盜鬼偷首骨門生不忍醜屍分賜
葬恩酬定策勲

奴材

郭子儀嘗言吾家
之子皆奴材也

天子龔家公將軍軟節度汾陽五福人莫如猶恨西平
生阿愬令公能以功名終膏梁遺蔭生八雄幸有曜兒
稱孝謹如晞如闕皆妄庸郭家子雖奴材都虞侯戴頭
來尚書留後轅門開尚書若斷老兵首郭家之子真奴
材

藍面鬼盧杞

藍面鬼內狡獪外慙人言鬼姦邪天子殊不覺藍面
鬼肆讒毀二帝四王相次起矯情雖蔽中皇君至論焉
逃鬼谷子中書令公獨先知朔方節度由女死忠貞不
學先中丞血面能令魯公舐

新店民

新店民何不樂歲豐穀稔可作權吏格詔書恩不渥九
重深下民賤咫尺天威情不展幸由田獵及芻蕘又不

深謀思及遠太陽苦被浮雲遮何不謗木肺石開南牙
廣恩沛澤被天下無事獨復光奇家

桐葉歎

涇卒生奇變狂奴夜犯宮渭橋頻力戰魯店冠元公御
史情雖切先生志不同掌心桐葉破千古恨難窮

樊段歎

倒印召追兵拔笏擊賊首表表段司農忠壯古無有草
開復仰藥不如先斷手何事樊太常殺身且遺醜舍生

固不易處死良獨難但看安不安偶因樊志喪愈覺段
心丹

弔裴晉公

客散午橋莊人空綠野堂涼臺風罷扇燠館月侵牀慷
慨平淮節淒涼別墅觴疇咨張國勢誰為整王綱邁爽
虛神觀堅貞折棟梁四朝全懿德五子繼恩光用舍關
輕重華夷仰聞望皇程纔睥睨牛李又跳踉鐫詆雖無
害浮沉大可傷元和猶負謗寶慶固難量侃侃詞臣疏

勤勤諫苑章聖心存眷顧天意幸聰朗險矣非衣讖危
哉第五罔腐儉鋒莫觸關子舌尤長元老雖云壽皇圖
競不昌可憐榮配享無復坐岩廊特旨探遺奏殊恩勅
護喪營塋空有地晉祀已無益朋黨終軒輊藩臣竟頡
頽惟遺身後傳功抗郭汾陽

柿林院

永貞天子開東邸書奕兩奴相表裏問安一語動天衷
從此大權皆入已牛家之女韋家郎女專誥命郎平章

書奕兩奴雙翼長書奴弄筆翰林院奕奴索飯中書堂
可憐八司馬一例投南荒惜乎監國不早起奕奴明年
方賜死

甘露行

甘露夜降金吾廳石榴枝上明珠明金吾將軍祥瑞奏
神策中尉恫疑生壁衣風吹機不祕赤梧兒郎眼中真
金輿決破紫果魚丞相綠衫借堂吏閻屍未臭鳳鳴山
節度頭落葉盤間天殺二兇天假手相公不必咎王璠

封刀行

永平殿下飛金仙洛陽白馬遍中原臺城饑鬼死不悟
武德沙汰成徒然會昌君相兩英傑大索逃丁出空穴
精藍四萬盡歸官天下僧尼俱長髮盧龍節度封寶刀
不為困藪容逋逃郎中淺見不足錄大中天子真痴叔
妄生更改復浮屠不記長安窟室通蓋吳

餞梁王

壽春殿延喜樓梁王欲歸天子留樓前百戲排倡優百

官陪晏酬未休梁王上馬樓上頭梁王東歸天子愁天
子愁梁王喜鴟梟暗移傳國璽碭山王氣瓏璚起皇后
捧金卮天子歌柳枝家亡國破無多時讀此不覺涕泗
橫流恨不剗刃
賊臣以快其心河東鴉兒獨眼窺紇干凍雀死不飛霸橋送客
那得知

王鍊鎗

朱晃帝中國人皆盜賊之沙陀起竝世勢力相挾持血
戰長河間六年筋力疲兵威日益弱國勢日益痿懦將

外名侮奸臣内生欺將軍食其祿報主死不辭願以一鎗勇往濟社稷危慷慨吐雄畧發憤親戎師夜火焚河梁敵人俱紛披南城竟不守拙速稱神奇藐視太原孽聲聲呼小兒良猷未及展庸君先見疑左右盡側目逐之惟恐遲竟奪虎熊旅付彼河上痴卒昇保鑾隊殉君忠壯屍丈夫頭可斷豹死固留皮雖曰置身錯大節終不墮蕭條滑州寺遺象父老思禍亂五十年置君如奕碁為臣死國難此義無人知五朝八易姓主死臣不悲

不意武夫中有臣能若斯豈無長樂老爵位榮一時縱
保兔園冊至今天下嗤

李天下

沙陀一夜鴉兒死夾寨堤邊黃霧起三枝誓箭挂馬鞍
誓與先王刷遺恥六年河上幾辛苦纔得河南一丸土
盧龍悖子雖剖心耶律敵人猶未虜柳風沐雨壯志荒
傅粉塗朱樂未央癩鳥本為太原孽驕子都化邯鄲倡
歌吳歛習趙舞吹玉笙擊花鼓十萬貔貅介冑雄三千

粉黛烟花主呼優名李天下龍顏輕批面如赭法刀不
斬敬心磨鏡破銅光解如瓦魏州總管著拓黃門高流
矢生金瘡劉尼不進銀瓶醴鳳瑟鸞箏殉龍體君不見
鍊鎗將軍有先知鬪雞咬犬呼小兒

金牀兔

兔子上金牀閉門作天子日從日上生竟促明年死大
鳥名鸞鷲四目而三足聲聲呼盧平羅平赤公族碧楮
降朱文赤光耀金虺本圖南越榮翻作西江鬼順天者

昌逆天亡南金越綾從多藏八都副使拜尚父四世相
承吳越王羅平髑髏悲血光

申伶兒

黃金鍾真珠酒弟飲此兮千歲壽真珠酒黃金鍾兄分
飲兮壽當與弟同兄不飲兮弟愈恭兄色變弟心疑弟
不退兮兄無辭申伶兒起合雙金卮一飲清腦死莫醫
置不知願全紫荊樹莫忘棠棣詩

陳橋行

唐宮夜祝邈佶烈憂民一念通天闕帝星下射甲馬營
紫霧紅光掩明月殿前點檢作天子方頤大口空誅死
重光相盪兩金烏十幅黃旗上龍體中書相公掌穿爪
不死不忍祕鴻寶畫瓠學士獨先幾禪授雄文袖中草
君不見五十二年血載塗五家八姓相吞屠陳橋亂卒
不擁馬撫掌先生肯墜驢

金櫃書

約誓書金櫃藏不鑿柴家幼兒祚不長弟兄子姪相繼

作書記署名傳晉王金櫃書藏禍府肘腋竒兇起慈母
深宮燭影夜無人漏下嚴更天四鼓寡婦孤兒不敢啼
戮地有聲金柱斧太平王子著龍衣定策元勲孰敢非
藝祖有靈君莫急朱牌金字火羊飛

澶淵行

鐵馬遼軍飲河水三關要地平如坻諸城閉壘百僚驚
西幸東巡議蠡起相公峙立不動搖忠肝義膽凌雲霄
親征雄謀出獨斷孤注一擲先得梟澶淵城上黃旗入

萬歲聲中河水

闕

神弧半夜發牀機天殺蕃酋蕃母立

蕃兒進退兩成禽可惜君王不追襲不追襲失天賜銀
幣年年勞奉使冠履從茲顛倒置君不見未和天尊多
善柔懶將一矢射岐溝歲輸二十萬匹絹不博遼兵一
顆頭

瑤華后

郭氏

君不見明道時美人爭寵皇后危外廷議起呂丞相內
殿釁結閭都知爪痕龍頰有實迹賜號猶得稱仙師美

人之寵尋亦衰又不見紹聖中婕妤凌后禮不恭用事
擠挑郝內侍順旨迎合章相公妄興魘魅卒無驗詔獄
慘酷冤血紅婕妤正位名號崇瑤華兩后轍迹同郭后
不歸孟后生還宮天刑不殺侍監賊地下仁皇媿哲宗

哀熙寧

熙寧天子仁如堯熙寧相臣奸如梟

王荆公

心管商口夔

臯朝保甲兮暮青苗三司條例分牛毛祖宗制度皆動
搖百年流毒毒不消嗚呼仁皇有意安天下悔不十年

相司馬南方聖人真土苴

紹述謠

紹述復紹述賢材一時出壞盡祖宗基遂得奸臣術

悲靖康

悲靖康一主戰百議和括金銀搜馬騾不將一矢射強敵奉使往來如走梭青城車駕不復返玉緝金支皆渡河君不見幸使橋纜六馬呼二酋話香火

一網謠 李綱

一網舉萬目張建炎帝開重光首竄賣國牙繼誅易姓
王募軍買馬事戰備誓為吾君復舊疆忤汪黃七十五
日中書堂奉祠已落張公章凌嗟乎一網去萬目弛敵
馬長驅飲江水張公督戰方未已張公督戰方未已

岳鄂王歌

君不見南薰門鐵爐步神矛丈八舞長蛇雙練銀光如
雨注又不見鐵浮屠拐子馬斫錮刀飛白霜貫陣背
蒐紛解瓦義旗所指人不驚王師到處壺漿迎兩河忠

義望風附襄鄧荆湖唾手寧朱仙鎮上馬如虎百戰經
 營心獨苦賜環竟壞迴天功捲旆歸來卧樞府錢塘宮
 殿春風輕嬌兒安宴醉未醒徒令功臣三十六舞女歌
 兒樂太平虎頭將軍面如鐵義膽忠肝向誰說只將和
 議兩封書往拭先皇目中血將軍將軍通軍術君命不
 受未為失大夫出疆事從權鐵馬長驅功可必功成解
 甲面赤墀拜表謝罪死不遲惜哉忠義重山岳智不及
 此良可悲烏乎肆讒言加毒手申王心循王口斬王湖

上乘驢走五國城頭帝鬼啼
金人相酌平安酒

悲建紹

張都督殺曲端關中斷右腕
中興天子無相干
秦丞相陷岳飛江左
長城墮中興天子知
不知鐵象馬精忠旗
羅索望風走烏珠
搵淚歸旗折馬斃事可
悲君不見竄李綱死宗澤可憐
建紹同轍迹中興中興良可惜

冷山使

洪皓

冷山使者蘇武流仗節
不畏敵國囚冷山
八月雪成丈

四月五月猶羶裘土人畏寒不敢出使者甘居十五秋
戎王聚落不滿百土廬羶帳風蕭索採薪乞食教胡雛
啣雪嚼羶籌漢策歸來館閣席未溫一斤南荒九年謫
天之報公何偏側君不見兩樞相一侍臣天之報公不
在身

韓太師

黃袍飛著嘉王體閣門知事從龍起經筵侍講戲倡優
定策宗臣趙汝愚永州死諫司臺憲鷹犬多擊搏忠正收

讒阿何劉明沈奮牙爪五十九賢投網羅北珠冠子高
一尺十四夫人分寵席行燈午夜鬧元宵京尹謝明朝
轉恩澤地衣紅錦齊中堂眞珠搭當生明光大臣排列
賀生旦進奏文移行四方太師權重專天眷邊釁胡為
起征戰威行宮省勢如山一日惡盈翻局面玉津園裡
悲風生日色慘慘天冥冥中軍統制權車轂密旨一語
加大刑殺韓侂胄天殺權奸天假手何事斲棺遠函首君王
不復三世讐地下權奸堪藉口

咸淳師相

賈似道

咸淳師相專軍國堂吏館賓供羽翼諸司百職聽使令
臺諫承顏言路塞輪舟五日一入朝湖山佳處多逍遙
諛言佞語頌功德邊事軍聲聽寂寥半閒堂連多寶閣
歌姬舞妓相懽樂十年國勢盡傾摧猶謂師臣堪付託
師臣師臣躬督兵珠金沙頭羅一聲十三萬人齊解甲
寡婦孤兒俱北行君不見黯淡溪流東復東木棉花開
生悲風師臣不忍馬革裹廁上有人能拉曾


從容堂詞

江萬里

朔風翻大江吹仆碧油幢懦將爭投款奸臣竊去邦從
容堂上鬼節義獨成雙更有熊湘閣全家死不降

厓山行

三宮銜璧國步絕燭天炎火隨風滅間關海道續螢光
力戰厓山猶一決午朝樂作兵合圍一字舟崩遂不支
檣旗倒仆百官散十萬健兒浮血屍皇天不遺一塊肉
一瓣香聞海舟覆猶有孤臣卧小樓南面從容就胡戮



玉筍集卷二

欽定四庫全書

集部

玉筍集卷三
四

詳校官監察御史臣劉湄

中書臣劉源溥覆勘

覆校官中書臣方大川

校對官中書臣潘奕雋

謄錄監生臣牟焜

欽定四庫全書

玉筭集卷三

元 張憲 撰

古樂府

古有所思行

我思古之人兮不可從乃在黃土之底青編之中青編
幾帙載名姓黃土萬塚埋英雄重泉黯黯隔白日宰木
颯颯生悲風我雖有語誰為通皇天不肯惜人物百年
轉眼如飄蓬秦皇漢武氣燄蓋一世彭殤邱跖俱成空

黃帝升鼎湖橋山葬遺弓虞舜死九疑鑿輿不還宮明
王聖主只如此紛紛二子直螻螻二女泣兮湘竹斑羣
臣歸兮弓劍閒弔古昔兮望遠見江上之青山白玉榔
黃金棺千年滯魄生辛酸功名震主亦閒事不若樽前
且破顏

從軍行

從軍天目山走馬臨安道雖不著戰士鐵鎖袍亦戴趙
公渾脫帽金鼓震四野秋風吹三關將軍不尚殺士卒

何時還白露下青草高樓多怨思杵聲空入夢誰解送
征衣三軍糧食盡將士衣裘暖女且拾橡栗我欲醉絃
管楚王挾纊越子投醪同功共事均苦分勞入參謀議
出事弓馬黃石之言聽者蓋寡

雉子斑曲

雉子斑雙雙起錦膺繡頸斑爛尾十步一啄粟百步一
飲水雌逐雄飛雄隨雌誓不願拘孿生寧求野鬪死野
鷹昨夜下蒿藜搦雄飛去雌獨歸雉子斑忍分離辟邪

伎作鼓吹悲

行路難

行路難前有黃河之水後有太行之山車聲宛轉羊腸
坂馬足蹭蹬人頭關白日叫虎豹腥風啼狗肝拔劍顧
四野使我摧心肝東歸既無家西去何時還行路難重
咨嗟乞食淮陰市報仇博浪沙一劍不養身千金徒破
冢古來未際皆紛拏行路難多岐路馬援不受井蛙囚
范增已被重瞳誤良禽擇木乃下棲不用漂流歎遲暮

擬招

以我美姝易彼紫駟裝刀頭兮飭箭厨西蕩秦隴東清
荆吳擬立功於不朽任市人之擲揄客有忘君背國竊
祿而活者亦何異食溷之鼠穴墓之狐厭見窮猿中株
於岩野困鳥脫羅於江湖吾誠不能依阿偃仰以殉世
仰皇穹而號呼若乃沐浴日光廓清天衢抑血誠憤發
於所感又孰知強弱成敗之何如豪傑兮歸來吾與爾
兮良圖

將進酒

酒如澠肉如陵趙婦鼓寶瑟秦妻彈銀箏歌兒舞女列
滿庭珊瑚案玻璃紫絲步障金雀屏客人在門主出
迎蓮花玉杯雙手擎主人勸客客勿停十圍畫燭夜繼
明但願千日醉不願一日醒世間寵辱何足驚珠萬斛
金千贏來日大難君須行胡不飲此長命觥劉伯倫王
無功醉鄉深處了平生英雄萬古瘞黃土惟有二子全
其名

行行重行行

行行重行行此別何時還
風霜阻道路歲月凋朱顏
層冰剝肌肉半是刀箭瘢
金印大如斗積功良亦艱
君看霍去病終葬祁連山

白雪吟

白雪復白雪寡儔將奈何
如下俚唱能使和者多
繁囂亂俗耳寧復知謬訛
五絃斷南風咸韶隨逝波
正聲久絕學舉世皆淫哇
吾將復大雅盡掃蚊與哇
后夔今

不在曲成誰為歌

俠贈

趙客虎皮冠走馬章臺柳自小恥讀書吳鉤不離手千
里殺讐家空中騰匕首俠累座上死嬴政廷中走屠兒
貪黃金狂生終掣肘丈夫難圖名合義死不朽安得藺
相如澠池一杯酒

房中思

紅象作小梳髻龍盤漆髮香泥擣守宮染透桃花骨白

馬不歸來倚牀弄紅拂桂陰綠團團坐對玲瓏月

銅雀妓

陵樹日沉西秋風石馬嘶芳樽傾總帳詎肯濕黃泥慘
慘笙歌合遙遙望眼迷玉人脆如草能得幾回啼

秋怨

雨聲繞山來撼屋風獵獵銀牀暑氣消金井下梧葉
脂墮微淚鸞鏡曉粧怯香冷紅象梳髻薄釵燕跼明日
玉欄干槿花飛莫蝶

火府告斗

黃巾騎馬騰紅雲綠草細書天篆文芙蓉小冠切白玉
伏地夜奏中天君灼灼桃花映羊首電繞魁罡百怪走
九皇一笑帝車移銀鹿作靶霞注酒玉衡閃爍招搖光
人間塵土何茫茫石家買得綠珠笑五雲踏地椒壁香
短衣吹秋車武子乾抱流螢照書紙虛空喉舌正司權
杳杳冥冥註生死

端午詞

榴花照鬢雲髻熱蟬翼輕綃香疊雪一丈戎葵倚繡窻
雨足江南好時節五色靈錢傍午燒綵勝金花貼鼓腰
段家橋下水如潮東船奪得西船標棹歌聲靜晚山綠
萬鎰黃金一日銷

白苧舞詞

吳宮美人青犢刀自裁白苧製舞袍輕雲冉冉白勝雪
激楚一曲回風高九雛鳳釵髮紫玉長裾窄腰蓮步促
翩翩素袖啓朱櫻金籠鸚鵡飛來熟館娃樓閣搖春暉

臺城少年醉忘歸
瑤牕綺戶鎖風色
桃樹日長蝴蝶飛
傾城獨立世希有
罷吟綠水停楊柳
急管繁絃莫苦催
眞珠賸買烏程酒

桃花夢

美人夜出胭脂井
骨醉香肌春不醒
去年阿護不重來
獨倚晨光照芳影
彩雲紅雨兩無心
覺來飛去三青禽

夜坐吟

蜻蜓頭落燈花黑
瓦面寒蟾弄霜色
玉壺水動漏聲乾

夜冷蓮籌三十刻蓬頭兒子凍磨黑欲拾羈懷尋不得
起看庭樹響風箏斗杓墮地天盤側

秋夢引

翠翹半軀雙飛鳳
轆轤金井懸銀甕
萬絲翠霧刷鵝光
兩點秋波和淚送
芙蓉帶露不忍折
鸚鵡隔籠時自呀
多情宋玉正悲秋
故放香魂入秋夢

梁苑行

銀鱗靡靡天光晚
畫出梁王江上苑
修眉凝睇秋波長

薄袖分香春麝暖
氤氳寶鼎騰水沉
寂歷宮門閉金鍵
三十六竿吹紫雲
露冷高臺雙鳳遠

夏日吟

白石鑿鑿可礪齒
寒泉濯濯宜洗耳
六椽短屋雲下眠
三日南風樹頭起
金刀薄切紅鱗鯉
玉樽細嚼松花螿
大星西下月如冰
明漢南來天似水

楊花詞

東風吹春春不醒
桃花杏花空娉婷
萬絲剪綠暗如霧

千里相思長短亭亭前女兒十六七手挽柔條背春日
六街馬蹄踏黃塵雪花漫天愁殺人

食葵行

唵聲夜吠樊將軍袖刃一擲神血噴鴻門側盾撞衛士
怒叱項王如狗蹲黃流一仰一斗吞生啗彘肩何足論
書生豪猛不減此燈下漆盤生劍痕

發白馬

朝發白馬津暮及陳留縣兵事急星火驛程疾雷電左

挾弓右擎箭獨飛一騎報軍書百里王城馳急變丞相
鎮靜材清談白羽扇天子蔽九重張樂絳霄殿內門三
日不得朝咫尺天威無路見三十萬衆解甲降錦繡封
疆成廣薦明日邊風虜騎來背城借一誰堪戰壁倖竊
魯弓姦諛賈紀甌銜壁牽羊事已非束手藩臣忘入援
收淚踏邊塵含悲別宮院回首東南漢月高浙瀝風沙
破顏面白草黃雲望莫窮西樓尚隔湯成淀木葉山前
下馬時青衣始悟降王賤使者來君不見

擇交難

擇交難結交易盃酒可歲寒一言相背棄金蘭膠漆照
汗青夢魂難泰通幽冥但慚未到張元伯莫謂人非范
巨卿結交易擇交難擇交不慎生疑患方寸鬼門關對
面九疑山險其心易其顏口蜜尚甘香腹劍已巘岼人
生慎勿輕交歡君結綬我彈冠結交未若擇交難結交
結知己擇交慎其始嗚呼叔牙王佐今豈無安得鮑子
兮為我交夷吾

隴頭曲

策馬上隴坻七日行不了回首咸陽在井中萬戶蒼蒼
烟樹曉隴月照黃沙隴雲低芳草朱顏綠鬢不建功坐
待星霜頭白早持漢節拂吳鉤為君生斫隗囂頭誰能
知李廣百戰不封侯

出自薊北門行

出自薊北門遙望瀚海隅黃沙落塞雁衰草號雄狐河
水血成冰土塚碑當塗乃知古戰場本是賢王都武皇

昔按劍一怒萬骨枯
半夜下兵符六郡皆
謹呼將軍各上馬
百道追匈奴羊馬滿
大野萬帳收穹廬
英英長平侯六騾
走單于至今青史上
猶壯武剛車

北風行

北風吹胡沙客上居庸關
山高落日黃車重牛力殫
土岡隱顯際百步聞鈴鸞
白馬流星來上搭虎皮鞍
英英鞍上郎髮拳雙頰
丹竹槽駕鞭箭猿臂雕弓
彎連呼客避箭箭出雙
轅間客懼墮車下伏地
不敢看徑前驅車

去可望不可攀轉丐田野中一飽祈生還江南有少婦
閉閣畏風寒使識北風寒北風摧心肝

擬邯鄲才人嫁為廝養卒婦

妾家叢臺下自小善鳴箏十五面如月不離保姆行胡
塵西北來盜據邯鄲城驅民出戰鬪十戶九為兵五載
不解甲千里屍縱橫司徒朔方至敵勢始不撐官軍下
井陘良家盡焚劫掠為廝養婦哀怨何時徹

吳鉤行

炭山燒天色如赭神血噴人雙躍冶紫鑛百鍊結松紋
三尺清泠掌中瀉吳人作鉤鉤同形吳王不知鉤有靈
鉤師向鉤呼鉤名雙堪父曾飛應聲百金懸賚金為輕
吳人重鉤如連城吳鴻扈稽雙厲鬼價重連城精莫比
不殺句踐雪遺恥誤人亦似夫人七

採蓮曲

明月滿大堤盪舟湖水西槳牙鳴浪碎船尾拂花低綠
鬟濕香霧紅袖漬良泥採蓮不得藕空妬鴛鴦棲

空城雀

嗷嗷空城雀一飽啄餘場不比珍奇鳥自矜毛羽光翹
首仰喂飼巧語如笙簧卑棲樊籠裏黃口不得將

一鞘詞

一鞘容兩刀古人恥不佩一牝聚三雄君子忍為配株
林從夏南遺臭穢千古惟聞褚彥回不污宋公主

當盧曲擬梁簡文帝

初八月上絃十五月正圓當盧設夜酒客有黃金錢懽

濃易得曉別遠動經年相送大堤上舉杯良可憐

薄命妾

少長深閨裏面不識風吹自為薄情婦懶塗紅玉脂花
軒背春睡月榭惱秋思不嫁張京兆敢煩郎畫眉

猛將吟效孟郊

手擘敵人頭臨陣試劍術氣酣乳虎怒拳捷秋鷹疾麋
戰每在前上功當第一江南未嘗見自古山西出

刺客行

刺客膽激烈見義即內熱每聞不平事怒髮目眦裂方
剔奸相喉又斷佞臣舌試看腰下劍常有未凝血

胡姬年十五擬劉越石

胡姬年十五芍藥正含葩何處相逢好并州賣酒家面
開春月滿眉抹遠山斜一笑旣相許何須羅扇遮

春晝

樓觀參差半空起縹緲闌干烟霧裏綠萍一道浸鴛鴦
笑聲只隔桃花水柳下粉牆斜靠街當晝紅門半扇開

遊絲冉冉掛簷角燕子一雙何處來

江南弄

菱尾蒲芽水新足沙暖小桃紅夾竹誰家燕燕倦東風
戢翼畫梁春睡足螭頭舫子載醺醪勿惜千金買詞曲
明朝風雨蔽九川千里江南芳樹綠

日出入行

東邊日出羣動作蠢蠢營營異憂樂須臾力倦各暫寧
日光亦向西邊落枕衾未暖夢未成金雞一聲扶桑明

孜孜為善尚不及何暇欲存身後名

哀亡國

買桑餒蠶絲不多鑿注種藕蓮幾何廣陵夜月瑤花宴
結綺春風玉樹歌君不見黑頭江令承恩早白髮蕭娘
情未了狎語淫人夢不醒宮城綠遍王孫草昏昏黃霧
塞宮門白練寒生玉頸痕錦繡江山春似畫幾傷風雨
弔迷魂

瑤池曲

曼倩啼饑桃未熟綺牕珠樹層陰綠上清童子書臨關
鸞尾掃雲方種玉芙蓉畫闌春書長蕭韶一派起回廊
八龍未暇送周穆三鳥遽能迎漢皇風雨蒼蒼隔玄圃
不勞西望祠王母贈君桃核大如杯歸植茂陵陵上土

歸來曲

芍藥薔薇向春泣湖上春風政無力綠塵滿街馬跡多
良人未歸將奈何娟娟修娥久疑佇阿侯如今在何處
錦箏撥斷十四絃絃聲清苦愁不眠粉香翠黛凝芳筵

襄陽白銅鍍曲

襄陽白銅鍍下踏揚州郭可憐揚州兒棄戈甘面縛大
堤女兒何命薄青年坐失榮華樂蕩子功成未肯歸閉
門三月楊花落

楊白花

楊白花何輕薄隨風渡江去飛向誰家落江南風雨春
先老陌上悠揚為誰好永巷春歸夢不成綠池一夜浮
萍生

車遙遙

車遙遙推向何處去
勸君勿輕行前途有泥淤
勸君君不留銳意作遠遊
前有伏路者勇力能挾輶
挾君輶却君財夕陽衰
草暴君骸君魂有靈招不來

俠士吟

俠士有時有不平
無日無安得匕首劍
贈與軹并屠刺殺韓王
相報仇嚴大夫俠士死傷
勇亦勝懦夫活許身然諾
間不為勢利奪瑕瑜
兩不掩功意足相埒
俠士赫

赫聲懦夫厭厭生懦夫視死重俠士視生輕我吟俠士
詩俠士為我起斷却權奸頭少雪懦夫恥君不見臨安
軍士彼何人能斫申王鐵輿子

寒女嘆

楚楚寒家女老在閨房空懷標梅嘆對鏡悲春陽豈
無媒妁言配彼多金郎竊念豈容易欲嫁不復行坐使
窈窕容綠鬢成秋霜寧為未嫁女莫作失節孀

征婦嘆

日暮鼓鼙急呼聲如雷闕漢兵三十萬夜戰胭脂山風
皴皮肉組血染車輪殷技窮下馬鬪矢盡張空拳夫君
暴骸骨妾人摧心肝豈無膏沐容粧艷不成懽亦有琴
瑟絃音好誰與彈枕痕掩淚迹鏡影緘愁顏高堂舅姑
老聊復強加飡

靜女吟

艷女羅綺裳靜女荆布粧艷女嫁大將靜女歸農莊大
將死邊疆艷女愁空房農莊務耕作靜女勤筐筐艷女

金瓶梅詞話卷三
卷三
一
送三嫁末路流為娼靜女教子成五福垂高堂好花空
窈窕桃李不如桑

昭君怨

四絃嘈嘈彈北風胡馬嘶回頭望漢月遙落長安西白
草沒行路萬里春淒迷誰謂穉歸女去作單于妻拭淚
入穹廬顰眉向羊酪敢恨君恩輕惟憐妾命薄嫁女媚
夷狄良為中國羞謀臣自無策畫吏不須尤

秦臺曲

層臺五百尺下瞰長安中人言秦王女學仙此成功弄
玉跨彩鳳蕭史騎赤龍雙吹紫蕭去千載永無踪惟畱
鴛鴦夢萬枕魘愚蒙

神絃十一曲

朝行青溪曲暮宿青岩阿女蘿施長松白蘋依綠荷神
來水風生神去水無波朝雲不為雨夕露將如何

右宿阿

古皇上帝高無語十二天門守金虎道君飛下玉清來

獨與蒼生作宗主奈何人事多覩縷閣皂號赤狐玉泉
飛白鼠武夷失左肩羅浮虧右股東明海波高拍天幽
魂滯魄稱神仙腥風剝面晦白日老蛟頑蜃垂饒涎道
君道力通上玄天篆印文紅玉鐫七星劍光上掩斗五
嶽小冠騰紫烟飛雷走電搖山川巍巍正位專天權叱
咤百神如轉圜賢哉道君胡得焉嗟哉道君胡得焉

右道君

雙頭牡丹大如斗簇金小帽銀花鏤綠鬪長眉丹激唇

白馬黃衫灌江口平頭奴子金絲髮六尺竹弓開滿月
神葵帖尾臥牀前頑蛟尚染刀鏤血靈風颼颼石犀吼
吳船楚舵紛搔首紅雲忽報七聖來蜀波水色濃於酒

右聖郎

四十九鞭鞭馬垂合眼旋風馬頭起曲項琵琶金帖槽
七寶銀瓶勸金醴紅斑碎纈石榴裙弓尖綵縹飛輕塵
雙鬟髮鬢好容色十步回頭九媚人舌尖苦血噴紅雨
坤剝有聲微扣齒綠衣零亂野花枝頓地神狐拖九尾

右嬌女

石郎家住南山裏，夜叱臥羊成隊起。
砒光羅帽舞香山，金礦銀坑爛如紙。
竹節短鞭赤狐山，精水魅聲嗚嗚回。
風蹋水過溪，曲旋折山花，聘小姑。
右白石郎

香爐盤盤青霧起，靈帷撒動金錢紙。
練帶斜垂八尺冰，纏項白蛇神色死。
青溪小姑雙露乳，起著神衫代神語。
花裙繡袴蹋旋風，雙袖翻飛小蠻舞。
西山日落雲冥冥，金龍畫燭燈光青。
土妖木魅作人立，古壁空廊聞履聲。

繁絃嘈雜社鼓吼體羊腸磔牛首扶神上馬送神歸老
狐醉臥簷前柳

右青溪小姑

洞庭八月明月寒湖龍捧出玻璃盤湖風忽來浪如山
銀城雪屋相飛翻白鼉樹尾月中泣倒捲君山輕一粒
浪花拍碎回仙樓萬斛龍驤半天立雨師騎羊轟晝雷
紅旗照波水路開青娥鬢髮紅藍腮紫絲絡頭垂黃能
神絃調急龍姑來

右湖龍姑

西溪日落星離離龍姑廟下號狐狸東家少婦呼小姨

紙錢香奩左右提紅甘紫嫩栗與梨畫羅小扇相分攜
吹燈照道溪之湄古祠深深溪岸陟熒熒鬼火紅窠走
履聲襲人不敢啼小姨堅持少婦手心香一瓣謝姑恩
鸞刀自斫烏羊首

右姑恩

兩兩白玉童採菱湖淥中一雙木蘭棹飛臂破南風雁
頭刺帶綠菡萏花房紅拆來神女廟進入湘妃宮豈欲
偶奇遇願言神惠終

右採菱童

皇皇明下福祿是臻燁燁靈童按舞殿殿背蕭炳煥元

氣氤氳幡盤屈以下墜神昭回而上伸

右明下童

枝葉同生根株異歸萬物修短靡不乖違於惟靈祇順
庇咸宜穆穆一德雍雍百禧雷霆以鼓之風雨以舞之
俾爾生無阻兮俾爾歸有所兮

右同生

拂舞詞五章

翩翩白鳧集我堂下悠悠江湖邈焉得所白鳧之白皎
如雪霜金堂高明君惠無疆封湖夜開白鳧飛來青蓋

黃旗入洛何時鷓鴣食人剥面殘肌白鳧飛來吾與女
兮忘機

右白鳧

濟濟蹌蹌舞鳳飛凰童子不孤寡婦不孀聖人在上萬
物斯覩五日一風十日一雨成湯祝網大禹下車載道
賡歌盈庭都兪猛虎不食仁厚如騶虞克器各斂衽干
羽束簏蔭懷哉堯舜世千古共嗟吁

右濟濟

獨漉獨漉水高沒屋沒屋尚得水高何即野鷹西來摩
天高飛我欲射之氣衰力疲桃株泛泛東流西陷嗟我

伶俜與之同憾牀深幃低對影獨栖如有遠志勿念繡
閨吳刀夜鳴長弓在弑父死不報何用勞勞申胥復楚
魯連却秦一言定事彼獨何人

右獨漉

碣石沒海水淪湮無已時望之小如拳鰲冠露玉筭海
波揚黃塵碣石乃還故雖復高際天半已成灰土靈龜
固云壽豈與天地久騰蛇縱有神頑鱗終亦朽朱顏能
幾何轉眼成老醜胡不廣作懽日夜飲醇酒

右碣石靈龜

秋風下桐葉
轆轤動金井
美人汲寒漿
銀瓶垂素綆
綠雲掃晴空
靜洗青天影
淮王尊有酒
箕踞事酩酊
撫手作悲歌
徘徊顧光景
八公門前待
滄洲路非永
丹成劈空去
血劍全首領
文成八卦背
秀聚三花頂
逍遙太清中
龍虎遞馳騁
全勝茂陵郎
銅盤花露冷
終然三泉下
玉匣蔽幽境

右淮南王

秋來

雨聲連夜捲
江水霹靂破
車騰赤鯉寒
梢露翠臂空
飛

歷地黑龍扶不起大山搖搖小山崩黃能夜吐拳如冰
天宮鬼箭自空注下射行人攢刺蝟六丁長又攪明河
扛起虹橋翻玉波陽烏白頭朱雀叫電蛇閃爍天孫笑
曇雲藹藹白帝來銀旗玉甲光明開雪毛老虎排天門
颼颼涼氣吹黃昏袂羅小衫裁嫩綠金剪高堂對明燭
深沉鳳帳寂無聲一夜輕涼新睡足明朝織女會牽牛
更上西家乞巧樓

江南謝二首

江南謝今何在生綠畫羅屏春光不相待藉莖拗折蓮
絲長千尺春愁不可量 江南謝春風隔長夜栢枝亭
下水連空捲起銀瓶向身瀉綵雲分得香囊麝夢裡如
今頻見畫欲煩神嫗寄筵篔簹篔簹未彈先淚流

卿卿謠

煮蠶繅絲繅頭緒多出門上馬岐路差卿卿不謗奈卿何

君道曲

大君若天道廣運無不周明視竝日月生殺成春秋疆

場盡兩極聲教被九州
丞相任股肱尚書總襟喉
雷霆出號令前宿分諸侯
沈潛蓄陽剛高明破陰柔
乾健不少息兢業毋自偷
以此守神器堅固如金甌

天狼謠

煌煌天狼星芒角射參昴
獨步天東南燭煌竟昏曉
天弧不上弦金虎斂牙爪
萬里食行人白骨遍荒草
火執烏龍岡血染朱雀航
列宿不盡力五緯分乖張
戍客困疆場荷戈涕成行
誰為補天手為洗日重光

雙燕離

雙燕復雙燕，雙飛綉戶中。
梅梁立春雨，桂殿別秋風。
火焚栢梁臺，信斷烏衣國。
羈雌憶孤雄，雙飛難再得。
卵破巢既空，繫絲徒爾紅。
曾如燕赤鳳，能入漢皇宮。

綠水謠

今宵何處月，南浦木蘭船。
半夜涼風起，荷花如錦鮮。
莫剪莖上葉，水珠有時圓。
且留泥下藕，要使根株連。
鴛鴦不竝翅，好事琉璃脆。
解佩擲真珠，少酬交甫意。

君馬篇

君馬獅子花臣馬照夜白君著紫襜褕臣著金敵膝天
高風勁弓力强一鞭飛過黃茅岡豐狐狡兔少顏色玄
熊文豹走且僵君撚箭臣臂鎗馬上各垂雙白狼歸來
解鞍坐對飲一百觴劍尖啗肉臂作俎醉臥不知更漏
長

子夜吳聲四時歌

四首

朱雀街頭雨烏衣巷口風飛來雙燕子不入景陽宮爲

金瓶梅詞話卷三
問秦淮女還知玉樹空

湖上水雲綠荷花十里香
咿啞木蘭棹驚起睡鴛鴦
雄兩分去不覺斷人腸

白苧鴉頭襪紅綾錦鞦韆
玉堦零露冷羞折鳳仙花
去蕩遊子秋深不念家

瓦上松雪落燈前夜有聲
起持白玉尺呵手製吳綾
纒
紉征袍縫邊庭草又青

莫種樹

莫種樹種樹枝葉多枯楊易生稊鉞斧難伐柯秋風動
悲思春月夜如何

估客 二首

發舟石頭城繫舟梅根渚江月夜寥寥照見家人語
割裳製家書刺指題日月不知何時到但記今朝發

史童兒曲

君騎汗血駱兒臥紫絲幙杜鵑滿空山君行何時還

阿母詞

阿母似麻姑十指如鳥爪先彼日月生後於天地老

高句驪

魚鼈走朱蒙夫余王氣終金花紫羅帽長袖舞遼東

塘上行擬甄后

白露下塘蒲芙蓉秋露濕不忍生別離時抱兼葭泣

芙蓉花一首 三解

芙蓉花大如盃露為醴玉作臺勸客飲客勿推 芙蓉

花嬌殺人紅為袖綠為裙舞回風歌停雲勸客飲客須

醺 芙蓉花何娉婷舞嬌梁上燕歌響花間鶯子高未
合色曼卿先寄聲人間永夜秋風冷莫按韓娘絲竹亭

丁督護曲一首 三解

丁督護北征去衰草沒戰場郎尸在何處丁督護勿回
頭千里馬蹄塵遙遙盟津渡丁督護寶刀鞍上據百戰
無前敵收功洛陽路丁督護冬窮歲云暮相送落星墟
哀情向誰訴丁督護白楊響墟墓馬革易成泥郎尸今
暴露

段兒歌

玉童澆澆兩髻墜雙瞳射人秋水媚情濃意遠風骨異
微笑向人書段字花覆古城心欲醉地遠如今空有淚
春風淡拖東北來綠雲隔春眉不開郎眉雖不開未比
兒心哀紫絲竹鞭玉腕馬蹋破花城何日回

紅門曲

紅門欲開人漸稀
栖鳥啞啞漫天飛
西宮寶燭明如晝
玉筵圍坐諸嬪妃
黃羊夜剝博兒赤
金碗銀鐺進魚炙

銀漢依微白玉橋
隔花宮漏夜迢迢
內城馬嘶丞相朝

和睦州雜詩十四首

五將開新府
三軍解沸湯
將軍驅土鬼
部曲散夫娘

右大將令

白牙山水如湯
烏龍嶺頭日無光
五龍墮地化作狗
怒目嚙人烏喙長

右白牙

間花竹竿三丈長
紅皮縵笠繡衣裳
石榴花曲唱得好
爭奈吳娘不斷腸

右石榴花

十月四日天沙黃虎狼西來將軍亡帳前嬖倖屍骸僵
君不見崔杼鋒刃三尺長晏嬰民望那可傷

右黃沙行

孤城新築十丈高五狼西來成夜嗥將軍夜別美人去
軟肉不禁朱粲糟

右孤城

城土未乾城主改長旗夜入黃巢砦怨禽飛來遶砦啼
不學精衛填東海

右怨禽

鳳鳥不向阿閣巢網羅畢張將焉逃此身尚不免鼎俎

豈問摧殘五色毛

右鳳鳥

睦州女兒嬌如花閨門不出愁風沙今朝忽遇沙吒利

白馬馱入何人家

右睦女兒

婦人在軍鼓不揚軍中豈宜安女郎鄭旦西施齊入水

將軍真有鐵心腸

右旦施

西王孫女嫁東郎不學虞姬就劍芒忍懷遺腹事仇主

未見胡法生兒先滌腸

右西王孫

南國香誰家女容貌如花絕代嫩嫁郎西去久不歸今

日相逢在軍壘宮粧不著嫁衣裳三尺罽毼包鬢子

右南國香

相如全璧目眚裂劍指秦王衣濺血衣濺血不比儀秦
爭口舌

右壯士行

秦王雄飛六王伏六王戰敗疆土蹙英雄獨有朱屠兒
袖隱金椎入函谷圈中饑虎思人肉屠兒入圈虎閉目

右壯士行

義鶻子雙翼異長獨入雁羣擒雁王不比饑鷹肉飽思飛

颺君不見公孫子陽墜馬洞曾死七尺虎軀橫戰場

右義鷓子

睦州相杵歌六解

韓公西築受降城吐蕃不來城下行將軍築城未了
隔城聽得打城聲築城築城忙築城敵人去城不十程
雲梯火砲製作巧中有魯般能用兵搬土築城民力多
晝夜不息如擲梭黃梅雨來江水漲城脚不牢將奈何
蒸土築城不須高買石甃城不須牢城中一旦化為敵

十萬天兵敗天績一月築城城漸高將軍心喜民力勞
將軍須與城俱碎一寸城土皆民膏金城我我高際天
湯池泱泱洪若淵堅深自古說統萬猶有敵人擒赫連

三忠詞

精衛苦精衛苦口銜木石填水府水府若地平精衛作
人語海鯨三頭共一尾挾潮作兮挾瀾止吞舟殺人如
殺螳豈無傷弓禽不學精衛死精衛溺死不足恤填海
不乾誓願不肯畢長鯨悔罪海寧謐精衛雖死功第一

右精衛

戰銅城死湖水父忠臣兒孝子淮南烽火吹邊塵淮南
將帥逃如麈秋高覽鏡思血戰誓死不作偷生臣麾白
羽接短兵有進死無退生騎可陷身可殺忠魂義氣無
時歇銅城不平血不滅

右戰銅城

蛇磧在湖北蛇原在湖南神蛟誓擊蛇首碎蛆蛆不思
蛇味甘蛇類多蛟力少盡力搏蛇不了蛆蛆一旦化
為蛇肆毒毒蛟蛟潰腦神蛟死蛇當塗雷聲為我行天

誅

卷三

右地磧

富陽行

搖首上馬金鞭揮山頭白旗如鳥飛西來萬騎密蜂蟻
四面鼓聲齊合圍金城木柵大如斗五百貔貅誇善守
鐵關不啓火筒焦力屈花徭皆自走城南城北血成窪
十里火雲飛火鴉將軍豪飲不追殺掠盡野民三百家

鐵礮行

黑龍墮卵大如斗卵破龍飛雷鬼走火騰陽燧電火紅

霹靂一聲混沌剖山河傾不擊妖孽空作聲天威褻瀆
人不驚

燭龍行

燭龍燭龍女居陰山之陰大漠之野視為晝瞑為夜吸
為冬噓為夏虵身人面髮如赭銜珠吐光照天下天地
寬日月小烏兔盤旋行不了窮陰極漠無昏曉女代天
光補天眇女乃不知日被黑子遮月為妖慕食五緯無
精光萬象盡奪色下民媿炎皆昏惑燭龍燭龍代天職

胡不張爾鬣奮爾翼磨牙礪爪起圖南
遍吐神光照南極補缺免無損傷正畸
烏不傾昃天暮黑子紛誅殛重光重輪
開萬國胡為藏頭縮尾窮陰北坐視乾
坤黯然黑乾坤若崩摧吾恐女龍有神無
處匿

白翎雀

真人一統開正朔馬上鞞鞍手親作教坊
國手碩德問傳得開基太平樂檀槽鈇鈇
鳳凰齧十四銀鑲挂冰索摩訶不作兜勒
聲聽奏筵前白翎雀霜皜皜風殼殼白

草黃雲日色薄玲瓏碎玉九天來亂散冰花洒羶幕玉
翎琤珰起盤礴左旋右折入寥廓葦律孤高繞羊角啾
啾百鳥紛紛錯須臾力倦忽下躍萬點寒星墜叢薄碧
然一聲震龍撥一十四絃音一抹駕鶩飛起暮雲平鷲
鳥東來海天濶黃羊之尾文豹胎玉液淋漓萬壽杯九
龍殿高紫帳暖踏歌聲裏懽如雷白翎雀樂極哀節婦
死忠臣摧八十一年生草萊鼎湖龍去何時回

張魂啼血行 二首

孤城四面啼猛虎怒豹咆哮餓彪舞東海王公長獵兒
手有長刀腰有弩黃公前日為虎吞膽落獵兒深閉門
今晨馮婦復攘臂虎視不動門邊蹲君不見妖狐假威
不敢搏而况真虎據岩壑俵魂導虎已何時血腥荒草
愁離離

白面於菟行偃草雄劍為牙戟為爪夜越鐵關吞九牛
弱婦嬰兒眼中飽郊原十里吹腥風白骨塞途秋草紅
肝腸掛樹野鴉噪鬼火照城人跡空嗚呼獵師心力巧

藥箭無功機發早，舊魂走抱新魂啼。
一夜黑風天亦老。

次韻壯士歌

春來塞草青，秋來塞草黃。
草黃馬肥弓力勁，邊聲徹夜交鋒。
芒鋒芒直上，燭霄漢壯士目炬。
與之相短長，王師十年厭追逐。
朱粲黃巢食人肉，天津誰弔杲卿痛。
秦庭孰舉包胥哭，壯士怒翻海百川。
甘可西巍巍鸞鳳闕，肯使鴟鴞栖漫漫。
長夜久未旦，一聲啼白須雄雞。
君不見淮陰胯夫餓不死，一劍成名有如此。
斬蛇未覩隆準公。

沐猴寧數重瞳子

孟城吟

孟城如斗復如鐵百萬天兵半魚鼈
狼星燭地響晴雷白馬將軍夜流血
匣中寶劍寒生雷一擊能令泰山缺
怒提往斷落星丸獻與師臣補天裂

生別離

有鳥有鳥完之山一乳四雛良羽翰
一朝棄母絕四海母啼不絕聲
悲酸聲悲酸摧心肝生別離死別離
南隣

健兒戍渤海東家壯子征函關賣田買寶刀賣牛裝馬
鞍父母墮苦淚弟妹增離顏呱呱乳子獨慘慘妻啼單
出關道路遠上馬鏖戰艱百見月魄死十度霜華寒霜
華寒月魄死悠悠歲月何時已主將不尚謀士卒欲誰
倚英雄務割據盜賊何由弭白骨積成山仆地如螻蟻
普天事征戰荷戈動逾紀烽火入中原千村不一存初
聞父母訃繼傳家鄉焚有喪不敢奔有苦誰與論生別
離聞者猶銷魂死別離痛極聲復吞人生慎勿輕從軍

完山鳥啼聞不聞

殺氣不在邊

殺氣不在邊凜然起比鄰
隔城聞叫喧白日飛黃塵
春雨夜鬼哭青燈火燐燐
豈無籌邊臣百駝馱金銀
亦有館閣賓紅盈富倉困
佞語喜見色直辭怒生嗔
兵強不出戰師老志何伸

怯薛行

怯薛兒郎年十八手中弓箭無虛發
黃昏偷出齊化門

大王莊前行劫奪通州到城四十里飛馬歸來門未啓
平明立在白玉墀上直不曾違寸晷兩廂巡警不敢疑
留守親姪尚書兒官軍但追上馬賊星夜又差都指揮
都指揮宜少止不用移文捕新李賊魁近在王城裏

賦得關山月送速博安鄉

少室青連雲虎牢峻削鐵茫茫雒陽道寒月正淒切遊
子悲故鄉西望淚嗚咽豈不念早歸兵火久隔絕山高
月輪小關險車輪缺虎豹起食人狐狸坐憑穴枯草白

零露陰風青燐血趼足晝十程鶉衣冬百結弱子面削
瓜老妻頭覆雪紀綱無力人十進五復輟似聞鄉里雄
百萬總旄鉞王師雖戰勝妖孽未盡滅攘臂起作勢欲
歸備行列徒存壯士心奈此筋力別人固存老少月亦
有圓缺月魄死復生精神老衰竭關塞遠且長歸心中
道折六親不易見萬古憑誰說誦爾北征詩知爾心腸
熱念爾行路難贈爾關山月

白頭母次徐孟岳韻

道旁哀哀白頭母西馬塍上花翁婦數莖短髮不勝簪
百結鶉衣常露股自言夫本業種樹一朝棄業從戎伍
荷戈南征竟不歸不知被殺還被虜屈指十年音信斷
獨宿孤房誰共語家在錢塘古蕩東門前正壓官橋路
却憶夫在種花時春來桃李下成蹊自從夫死花樹折
錦繡園林成馬埒縱餘梨杏與梅茶無力入城供富家
富家遭兵亦銷歇金錢誰復收名花何況邇來新將相
一體好儉不好奢兵餘城市化村塢亂後名園作軍府

年年寒食杜鵑啼人家上塚西湖西時光荏苒易飄忽
可憐誰拾花翁骨君不見海棠風楊柳雨牢落錦紋箏
凋零金雁柱黃四娘家客漸稀蛺蝶飛來過牆去

澈海洋書海盜錄後

海漫漫颶風拍浪高如山盜長踞坐大樓舶手劍三尺
神思何安閒淮樞官見之心膽寒膠州龍公空受徑寸
珠耳環盜長乃為天除奸不用大呼天可汗天可汗刑
已失吾非利若財抵跪何足恤失土民眞罪人女命雖

螻蟻吾禮有主臣穴胃取心賽海神淫怒殺人天乃嗔
澈海洋濶無垠過者不用多金銀重裝往往能殺身

主家貓

主家畜雄貓文采玳瑁光晨滄溪魚飽午睡花陰涼營
營溝中鼠白日亢我牀鼠東貓去西所恨不相當一朝
忽相當反為鼠所戕淋漓兩唇紐跼促四足僵呼奴起
擊鼠鼠去貓倉惶作炊竇貓腹割裳裹貓瘡愛貓心雖
仁敗事流毒長所媿主家閻貓驚庸何傷

塗山渡河女

公無渡河公渡河公自取死死奈何女無渡河女渡河
後有白刃前白波上無橋與梁下無舟與槎渡河女寧
死河水不死賊戈死戈比節婦死水齊孝娥所以塗山
女受死不受辱勿使賊刃斫妾頸寧死河水爛妾肉瑩
篋有聲如麗玉

琴操

干戈不息殆且十年余流連江湖間幽憂
憤奮不見中興涯際四方又無重耳小白

之舉思欲終老深山大澤中且所不忍將
欲仗劍軍門而可依者何在作琴操十二

以寄意焉。俾能琴者尋聲而鼓之。余倚歌而和之。或者可以少泄於梗梗云。

澶水東奔兮澗水攸同。禾黍離離兮薺麥蓬蓬。周召不作兮桓文告終。王目以公兮雅降為風。烏乎平既自夷兮。報寧得不窮。

右閔周操

秋草兮芊芊。黃金臺兮夷為淵。悵廣宇兮裂瓦。望離宮兮生烟。淚可盡兮目可穿。思昭王兮不可言。

右懷燕操

帝庭淵淵。玉京雄兮。憶我壯年。竊觀光兮。變龍在朝天。

下文明兮既盛則衰喻炎涼兮耄期倦勤禍亂之秋兮
通都大邑天寶荒之織畚販繒天寶昌之天自作孽俾
我不能生兮

右觀光操

茫茫禹蹟兮畫為九州侯伯牧守兮職貢是修女或不
臣兮天討罔偷夫胡今世兮敵國同舟烏乎哀哉兮吾
誰與謀

右禹蹟操

聲裂裂兮揚沙騰颺雷冥冥兮雲蒸怒潮雨澤不降兮
倏虹滅而電銷不擊妖孽兮不潤枯焦天威自襲兮怒

曾不崇朝

右風雷操

日薄西山兮沴氣交羅魑魅迭作兮狐狸嘯歌方當陽
於中天兮四海融和忽末路以晦墜兮光景蹉跎取虞
淵兮浴咸池夾六龍兮挾以馳世無其人兮奈日何其

右西日操

高山巍巍兮危峰際天蟠據厚土兮根入重淵草木不
遂兮赭如血鮮磽不可薪兮瘠又不可以田徒載祀典
兮配岳與川不雨不雲兮民何望焉 右高山操

渭水齋齋兮函谷嶙峋我馬西逝兮意將涉秦父母止
我兮子宜愛身子母遽西兮秦其有人

右涉秦操

漳之水幽幽其色望魏陵兮悽然心惻美人化土兮銅
駝荆棘徘徊涕泗兮弔孟德剪群雄兮建皇極何中道
兮變鬼蜮爾後人兮鑒得失毋狃猖兮恃強力甘惡名
兮稱漢賊

右望陵操

春江兮潺潺目浩浩兮烟瀾水浪浪以激石日汨汨而

含山忽中流之白叟楫芳桂兮舟木蘭渺浮羽以輕舉
坦千里兮忘還豈余心之不能梗王室之未安

右春江操

大田蕩蕩時雨施之東作既興耜耨苗之黍稷穰穰歲
計資之嗟我驅馳寒饑載途豈不懷耕歸守弊廬民亦
有言田實禍余

右懷耕操

屈吾指兮計吾壽指白日兮怨清晝惜芳年兮不吾幼
螭蛄兮春秋長無窮兮宇宙

右惜逝操

彼薜蘿兮帶女蘿乘赤豹兮變現多手擲揄兮足趨跳
夜吹燈兮晝長嘯為鬼為物兮我不知察爾情狀兮識
者誰

右山鬼操

朔風起兮天地昏冥寒氣結兮河水成冰舟楫不行兮
車騎憑陵狐兮狐兮身且輕狐猶疑兮側耳聽

右狐兮操

我有巢兮手自為之朝朝暮暮兮飛銜樹枝精神疲勞
兮爰托我私女何為者兮心實嶮巖據我所兮使我朝

不得食而暮無所歸鳳凰莫訴兮余心孔悲

右鳥失巢操

萬木號風兮振山阿垂舌舐掌兮刀劍磨豐狐狡兔兮
女食自多虎兮傷人兮奈女何

右山君操

有犬狺狺兮相雄其聲努目研研兮復獐其形匪盜是
求兮主心靡寧牢可食兮竇可經犬母咋骨兮汚主人
之庭

右咋骨操

飛鳶兮徐徐翔而集兮汚渠幸一飽兮腐鼠遽仰嚇兮

天衢醴泉可飲兮竹實可茹
鳶母鳳嫉兮鳳食有餘

右嚇腐操

春江東流懷我舊隱萬岡層來一溪橫引碧漣漪以生
瀾綠衡從兮分吟修竹映戶茂樹覆楹枝纂纂兮秋實
林粃粃兮春筍羹魴鯉兮梁有筍厨雉兔兮鞬有隼奕
清晝兮文楸鼓良宵兮玉軫顧宴安兮是湛忽垂兕兮
荆蠹抑天意之玉成降孤臣以疾疢復吾故兮允艱悵
忘歸兮安忍

右懷舊隱操

和趙子固平章水仙二操

蹇予步兮南浦水落落兮石魯魯望漢江兮心獨苦擲
珠結兮贈交甫

右解佩操

整予駕兮洛食水瀰瀰兮石泐泐望成臯兮目無極絙
朱絲兮待曹植

右鼓瑟操

賦松隱二操

彼髯叟兮幽獨避秦爵兮如避辱甘霜雪兮在空谷牽
女蘿兮補茅屋

右牽蘿操

彼髯叟兮幽貞蹇吾形兮全吾壽齡鬱歲寒兮青青抱
長鏡兮采茯苓

右采苓操

泰寓操

方寸微兮具大圜形不鑿兮七竅全天光發兮日月內
旋我遊其中兮以樂吾天

玉筍集卷三